



**JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL**

Komunikado Imprensa

Períodu : Dezembru 2010

Edisaun : 12 Dezembru 2010

JSMP Hala'ó Diskusaun Aberta Konabá Kna'ar Parlamentu Nasionál

Iha loron 16 Dezembru 2010, JSMP liu husi unidade Projeitu Observasaun Parlamentu (POP), sei hala'ó semináriu nasionál ho tema “Diskusaun Aberta konabá kna'ar Parlamentu Nasionál nian”. Seminariu ne'e sei realiza ho apoiu husi *The Asia Foundation* no USAID. Partisipantes sira sei mai husi area rurál sira no mós aldeia balun iha Dili laran, ne'ebé mak JSMP identifika nu'udar grupu benifisiariu ne'ebé sei falta informasaun konabá kna'ar Parlamentu Nasionál nian. Orador husi semináriu ne'e mak membrus Parlamentu nian, ne'ebé reprezenta husi bankada Aliansa Maoria Parlamentar (AMP) no bankada opozisaun Fretilin.

Luis Oliveira nu'udar Diretór JSMP, hateten katak “*semináriu nasionál ne'e nia objetivu mak, atu hatutan deit aktividade JSMP nian hanesan desiminasau informasaun no workshop konabá kna'ar Parlamentu Nasionál nian iha area rurál. Husi aktividade hirak ne'e, JSMP nota katak povu barak mak lahatene kna'ar Parlamentu Nasionál nian. Sira rasik ejiji atu hasoru malu direitamente ho sira nia representante iha uma fukun Parlamentu Nasionál nian.*”

Iha tinan 2010 nia laran, POP hala'ó desiminasau informasaun no workshop konabá Parlamentu Nasionál nia kna'ar iha area balun, inklui iha distritu Oe-cusse, Ermera, Suai, Maliana, Manatutu no Aileu. Husi partisipantes desiminasau informasaun no workshop sira ne'e JSMP identifika deit partisipantes balun atu atende semináriu nasionál JSMP nian.

Iha Seminariu ne'e, deputadu sira sei hatan ba perguntas konabá sira nia kna'ar, prosesu legislativu, prosesu fiskalizasaun no prosesu sosializasaun lei. Parisipantes sira sei hetan oportunidade atu husu sira nia perguntas no fo hatene ba sira nia representantes konabá sira nia hanoin.

JSMP hein katak liu husi diskusaun aberta hanesan ne'e, membrus Parlamentu Nasionál bele hatene liu tan nesesidade báziku povu nian, atu nune'é bele produs lei ne'ebé qualidade aas no refleta duni povu nia moris no situasaun. JSMP mós hein katak, diskusaun aberta sira hanesan ne'e, bele habo'ot liu tan povu nia koñesementu konabá sira nia representante sira nia kna'ar no

bele hatene liu tan, oinsá povu bele partisipa ativu iha prosesu lejislativu nian, iha nasaun demokrasia nia laran.

Atu hetan informasaun kle'an favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883